


Ene Étôdôngédani Éviga G'ôba



Gésangô gegé gétetu mbe:

Ene Étôdôngédani Éviga G'ôba

Mabégôme mamasevôu gô Matendéo MaNzambé. Masanigôa me. Ivô manigôa te anguene Matendeome maNzambé.

Ogi ANzambé ôviga g'ôba. Ondéké môyakô apie na meba mapie gô mitémamie miane ookô nzaa na sôé. Okô môma eeséda môtémedi amuene na atsika mane mabévani mamayanzangô, na eetsa Kumu Jésus Christ môtémedi wetso gétsumé Mooboyi edi paga, Amuene Kumu angatsutsuga na vandé môma nône. Angeetsa gényônga na gétabé sedi gô môtéma amôma nône. Memuene namabandôa évamba na Kumu Jésus Christ gô 1937. Evambee éasô n'edi êkôndamaka te kôndama, na ésapanzégaka. Gôndé éwe ôtanga gésangô gegé, ôkô mbe madeo ôsideekeda Jésus Christ monyoe woo wetso, tambô ndéône yoo ébuéyi.

— O te me, Watson Goodman (1920-2002)

Romains 5:8

Ivô Jésus Christ amasinga éwa gôndé wa n'anyô tômabaka oma abévani. Tôena étondo éena Nzambé gôndé wa n'anyô oma te gô éne.

Apocalypse 1:5

Eetso éne, nôédiia te gôndé Jésus Christ. Angô mbangi aNzambé ésapatakani. Angô Jésus te Muana ANzambé amapanga ébôtuni. Na angô amapanga ékunduga g'ôwa andé na monyo ôsa-kôdéakani. Jésus te Kumu akumu yetso ditôma va tsina. Angô atônyôngéô. Amawa gôétôoboo gô mabégô masô n'anyô mabévani.

Jérémie 31:3

Nzambé Amôbô na Môbô amatsutsuga na vandé me va mbeego. Ameenda mbe: Nagônyôngéô ti v'ekôdéô éanyôngéô na étondo ésaba n'ebandô n'ekôdéô. T'ebandô nagôweseda gôndé memuene na gényônga.

Jean 3:16

Menyani mbe Nzambé amanyôngéô oma muetso pepe. Ameetsa Muantedi ékika, gômbe ône eetsa môtémedi wetso na gôndé angô gébé na paga, asangawa ivô angaba na monyo aNzambé amôbô n'amôbô.

2 Jésus Christ te Nzambé érabôtu gô tsina

Matthieu 1:22, 23

Mabégô mema te gamavovo môpandôédi amata maKumu Nzambé. Va mbeego amavovo mbe: Tômbo madeo asigesangané mômôgô angatsua émé. Angamôôga mbe: Emmanuel. Evédegéô mbe: Nzambé andé n'asô n'anyô.

I Timothée 3:16

Na gô pie, gôsaba môma oongôa éénda tsaé n'esôga étôgobedani érabaka éav'esooe. Kumu éesôgee te ône amatendu mbe: Amatsutsuga vandé we ga môma. Gédidi SaNzambé gématubéda gandé angô gébé n'oési. Ameenano n'anziye yag'ôba. Inedi émeekédu gô mongo metso. Asi tsengeye yetso amamôétsa mitéma miaô. Na amatômbu na gô gédigaa sandombee géndé g'ôba.

Jean 1:1 na 14

Nzambé madeo asikana tsina n'oba, ôgie wedi te ôndé wangô. Ogie ône te ôndé na Nzambé. Ogie dôta te Amuene Nzambé... Ogi ANzambé ômakoga môma. Tômeena ôbébayi wetso ondombée wedi te ône okumakee ômeetsô angô na Tétédi, angô Muana ékika. Amatubéda wa n'anyô gandéké Nzambé, Kumu amabégô mapie, na gandéké étondo éaNzambé évôni gôndé wa n'anyô.

I Jean 4:15

Okô môma eenda mbe: Jésus te Muana ANzambé, Nzambé adigaa gôndé angô na angô dôta te môvo na Nzambé.

Colossiens 2:9

Menyani mbe Christ te ôtô ômeengéa Nzambé gôéenanô na vede gôndé angô.

Esaie 9:5

Endé te nane. Tôbôtéyiô muana. Tôétsiô muana amômôgôô. Enyangée n'otômue wetso ôndé gô ébékabékae éedi. Inedi te One asôbasôbanôni, na Môongi oma, na Nzambé Kumu angudi, na Té-tene ésaba n'ekôdéô, na Kumu agétabé.

Matthieu 17:5

Agébaka gôévovo, ôbôngé obébayi ômapika ahngô muetso. Gô gatsé ôbôngé gômookanô ôgi ômavovo mbe: Odôô te Muanami amôtéma. Gényônga sami setso te gôndé angô. Oôkéôni angô.

Luc 1:35

Anzine émamôaabéa mbe: Gédidi SaNzambé gégaviga na gôndé éwe na ngudi yaNzambé dingapika éwe ga ôbôngé. T'ebandô muanee angabôtewe, angatetu mbe: One amatômu na Nzambé, na dôta Muana ANzambé.

4 Amuene Jésus atônigôa gandéké Angô

Jean 11:25

Jésus amamôpandôéda mbe: Me te gékundu-géô sanyô. Me te Kumu amonyo. One eetsa me môtémedi wetso angaba na monyo buéyé mbe awéyi.

Jean 13:13

Anye nôneegeda me mbe: Môékédi asô, na Kumu asô. Ii, nôvovo na mitayi. Me te môékédine wanyô na kumune yanyô.

Jean 8:58

Jésus amanigôa Ajuif mbe: Me nanôbeenda na gô pie mbe: Abraham madeo asibôtu, te me nandéké.

Jean 9:5

Vagébaka me gô tsengene, me te gévede géta-néda tsengene.

Jean 10:7

Jésus amatimbôanéda tsavane mbe: Me nanôbeenda na gô pie mbe: Me te ôkuké av'ombaa amôgômba ôkeneo mandombo.

Jean 6:35

Jésus amapandôéda ahngô mbe: Me te môpe-mba ôétsa môma monyo. One aviga na gôndé me asangadôôkô nzaa. One eetsa me môtémedi asangadôôkô sôé.

Jésus amayanza Mabégô matubéda ngudi yaNzambé

5

Matthieu 14:19-21

Vane amatôma géômbége setso gôédigaa v'esi-nga. Na amabongo mipembamie mitayi mine na tôniaama tôbaé tagô mbéyi na amabôkaméa miso medi na gô ngongo na amakuméda Nzambé. Amabukua mipemba na ameetsa aneengie. Ahngô amamikabanéa n'oma muetso. Môma na môma amaa na amanguta. Aneengie amabongo tseseye n'ebéndékée émasanéakani émayuéséda nzima yatsaô na tsaô dibaé.

Luc 5:4-6

Vamamanangô eekéda amatôma Simon mbe: Weseda mbôngône na va ngenge gôtiba mebame. Vane éwe n'akoo, gunyani mbusaye gôédiia nyama. Simon amamônigôa mbe: Môékédi, menya mbe we tôteyanzi pitsine nyetso gédiié sôma. Ivô gô ôgie woo, nangeenda gatômi éwe. Vane Pierre n'akedi amagunya mbusane.

Matthieu 20:30 na 34

Asi pogu abaé amadigaa va kôbangô anzéa, amookô mbe: Jésus te angô ootani ône. Vane angô abaé amaamugana mbe: Môékédi, éwe Muana aDavid, eena we ngeba. . . Jésus ameena ahngô ngeba na amabanda miso maô. Tsina na tsina angô abaé ameena amakea nzéepo na Jésus.

6 Jésus Christ te Môvangi na Kumu

Te gô ngudi yedi mbe Nzambé amakana na amavanga éetso éndé g'ôba na éetso éndé gô tsina. Eetso, ékégea mbe: éne éenanôni na éne éseenanôni. Ngudi yedidie te yedi. Na ditômuye na ényangée na ngudi yetso te yaChrist. Nzambé amavanga na amakana éetso gô ngudi yaChrist na éetso te éedi. — Colossiens 1:16

Ivô gô pitsiye yamôyusumédie édi, Nzambé avovo na wa n'anyô te gô ngudi yaMuanedi Jésus. Gô ngudi yaMuanedi dôta Nzambé amakana tsina n'oba. Na amakônza mbe Muanedi te ône angaba Kumu ayetso. — Hébreux 1:2

Christ amawa na amakunduga gôétetu mbe: Kumune éane amawani na éane adôngani. — Romains 14:9

Nzambé asavetsua divanga yedi. Nzambéne te épo, ône amanôbambéa mbe: Bakani môvo n'ami gô pitsi yanyô yava tsina nômagésangana môtémovo n'ami gô évambevo na Muanami Kumu Jésus Christ. — I Corinthiens 1:9

Buedi mbe éongo éetso éalsrael émenya ébégo édué. Anye nômabôkéda Jésus gô gésumu sowa. Nzambé amakônza va mbeego mbe: Jésus ôdôô angaba Kumu na Christ, ône amasevôu na Nzambé. — Actes 2:36

Jésus Christ te Môtsundédi oma muetso 7

Oma muetso ava tsina angakôkangana va mbe-
ne éedi. Amuene angatatôa oma abévani na ami-
sôba muetso gô minongo miaô, mônongovo ga-
tatôa môkeneyi eebodu, atatôa mandombo na
kange. — Matthieu 25:32

Amuene Tétee asatsundéda môma. Ivô ameetsa
Muenedi ényangee éetso gôétsundéda oma.
— Jean 5:22

?Ewe ndaa ôeséda muana aTétee n'oo? ?Ewe
ndaa ôdeta muana aTétee n'oo? Wa n'anyô
muetso tângatandama va mbene aNzambé gôé-
tsundédu n'Edi. — Romains 14:10

Jésus amatôma we mbe: Kiakani. Ikédani oma
muetso. Nigôani ahngô mbe: Me Jésus te ône
amasevôu na Nzambé gôétsundéda ane adôngani
n'ane amawani. — Actes 10:42

Metso mane mangeenanô nyaa ôngatsundéda
Nzambé na Jésus Christ, atsundéda mabégô ma-
masuégu gô mitéma mioma. — Romains 2:16

Me Paul natôma éwe Timothée, ébégô édué
évôni. Nagôtôma éangô va mbene aNzambé na
va mbene aJésus Christ, môtsundédine ane adô-
ngani n'ane amawani. Nagôtôma gômbe génikéô
saChrist na ôkumue wedi génaneegeedu.

—II Timothée 4:1

8 Géobogeo samôma gésaba na muene, te na Christ

Me te ômbée wanyô. Okô môma eengéa vandé me angoobou. Angeengéa na angakusa gôéaa môyakô. — Jean 10:9

Jésus amapandôéda ahngô mbe: Me te nzéane éanyô. Me te kumu amabégô metso mapie. Me te monyoe wanyô. Gôsaba nyene nzéa éôta na gôndé Téta, buétsé te vandé me. — Jean 14:6

T'ebandô nanôéndi mbe: Anye nôngawa te gô tsina amabégô manyô mabévani. Nôngawa gô mangô te gôtsumanye me paga vanigôa me anye gômaviga me, na gôkea me, na gandéké me. — Jean 8:24

Vane vamanangô ésipa, ti v'ekôdéô éasipaga, amakoga aka ébandô éagéobogeo samôbô na môbô, gôndé muetso amôgobedani. — Hébreux 5:9

Gôsaba géobogeo gô ngudi yamuene môma. Gô tsinane nyetso, gôsaba éne ina, ta n'évo émeetsa Nzambé gôndé wa n'anyô oma, mbe tongoobou gô éangô. — Actes 4:12

T'ebandô Jésus andé na ngudi gôétôoboo deo noo, ngu na gô mbene n'okendô. Angô ooboo ane aviga na gôndé Nzambé gô inedi gôébégô andé monyo gôévovo na Nzambé gôésungéa omee ane. — Hébreux 7:25

Géobogeo samôma gésaba na muene, 9 te na Christ

Colossiens 1:12-14

Kumédani Téta Nzambé na gényônga gévôni. Gôébégô te angô amanôkoa gôéba kuanakue gôédiia ôkitie ômakeneo na Nzambé gô tsenge éedi agévede. Okitie ône te gôndé oma aNzambé. Endé te nane. Amatôwata g'ôvéga ômatômuku we n'evitsi. Amatôengéda g'ôtômu aJésus Muandedi amôtéma. Gô ngudi yedi tômoobou. . . . Mabégô masô n'anyô mabévani mamasingéô kokoo.

Luc 19:10

Gôébégô me, Muana Amôma namaviga gôébuta na gôéoboo ane amadimbanani.

I Corinthiens 1:30

Nzambé amanôgésanganéda évambevo na Jésus Christ na angô Christ te éodo éaso n'anyô. Gôndé angô Christ, tômatsimamédu gébé n'oési va mbene aNzambé. Na tôndéké môvo na Nzambé gô pitsi yasô yava tsina. Tôndéké tômoobouni.

Tite 2:14

Amadeekeda amuene gôéwa gôndé wa n'anyô, gôéyuua we gô mabégô metso mabévani na gôégôgéda we mbe tôngaba omedi, asi évambevo n'edi. Na mbe tôngaba na gényônga na môvinéné gôéénda mane mamisôba.

10 Nzina yaJésus ditôsungéa ôpisa aNzambé

Gô ngudi yanzina yaJésus, wa n'anyô tôka gébé n'oési va mbene aNzambé. Na va ngongone vane atôyuua g'ôpisa aNzambé. — Romains 5:9

Wa n'anyô tômoobou na tômasingéô kokoo gô ébévee éasô n'anyô gô ngudi yowa aChrist, ône amatômu na Nzambé. Te gô ébégôe éne tôena gayekégéa ngeba yaNzambé gôndé wa n'anyô. — Ephésiens 1:7

Okô tôndé gô gévede gandé amuene Nzambé andê gô gévede, vane tôndé na vitoo weene na weene. Na nzina yaJésus, Muana ANzambé ditôgôgédaka mabégô metso mabévani. — I Jean 1:7

Anye nômoobou gô midigédi miasagô mima-tsikéô anye na tétée yanyô. Nôsabômu mbe nômoobou, kaka gô ngudi yadode na yadodo. Ivô anye nômoobou n'osunu ôvôni anzina yaJésus. Andé ga éndombo ésaba éagêkonzo na ésaba n'evisô. — I Pierre 1:18, 19

Okô mbe nzina yanyama dimaba na ngudi nane, tambô tasani ngudi diotéani dindé gô nzina yaJésus Christ. Amaadeekeda Amuene ôgondoku agébé n'oési. Nzina yedi digôgédaka matasa masô n'anyô gômbe mikebanganô na ésima ébévani ésangamana ngudi yasô. Na vane tângaba na ngudi gôéyanzéa Nzambé Kumu amonyo.

— Hébreux 9:14

Ephésiens 2:8, 9

Nômoobou te gô ngeba dimeenanô anye na Nzambé vameetsa anye Angô mitémamie gémô-tsumé paga. Géobogeoge géne gésibandôé n'a-nye. Nômagéétsô na Nzambé géenza. Géobogeoge gésikusé gô ngudi yamayanza manyô. Vane gô sangô gôsaba môma anganyemôgani.

Romains 5:1

Endé te nane. Wa n'anyô tômeetsa Jésus mitéma miasô n'anyô gétsumé angô paga, tôenanô na Nzambé ti ee mbe tôsaba n'oési. Na tôdigaa n'Edi na gétabé gô ngudi yaJésus Christ.

Jean 6:28, 29

Oma ameevôa Jésus mbe: Gôédugéda éyan-zee ényôngéô Nzambé ?tôngeenda nayee? Jésus amanigôa ahngô mbe: Eyanza évôni ényôngéô Nzambé mbe nôyanza éangô, te mbe nôétsa mitéma mianyô na gôndé ône amatôma angô na gô tsina.

Jean 20:31

Ivô mabégô mamatenduni éma, mamatendu gômbe anye nongamenya mbe na gô pie, Jésus te Christ, Muana ANzambé. Na veetsanye Jésus mitéma mianyô mietso, nôndé na monyo apie.

Psaume 103:11

Ngeba yaNzambé divunda gôndé mômane amôgobeda na gomo. ?Okanee angebaye ôkanégu na sôma ndé? Okanee wedi te ngu na étongoe éndé bandôa g'ôba na gô tsina.

Psaume 103:17

Ngeba yaNzambé dindéké gôndé ane amôgobeda na gomo, na yangô disakôdéa. Na mate medi meenanô gôndé anaô, na gôndé ana anee waô.

Lamentations 3:22, 23

Ti éne étôkeneani mbe tôsayôu tsina na tsina, te ngeba yaNzambé. Ngeba yedi disakôdéaka. Dinikéa ékôndama dingôngô yetso. Ah Nzambé, mavômame moo mootéa ényepa.

Psaume 108:4

Ngeba yoo Nzambé, dinde dipôni na ditongoni. Ditongo ndii na g'ôba. Mabégô moo mapie matongo te mônongovo na mavunda gôéoota na gô ngongo adibôngé.

Michée 7:18

?Gôndé nyene Nzambé agono n'ewe-a? Gôsaba. Ewe ôsingéa môbévine kokoo. Ewe ôeeba ébévee éanoo asanéa gô tsina. Ewe Nzambé ôsaba na pigaga. Gôébégô ômuene ôtsôkea te ngebaye yoo.

Nzambé atôbambéa mbe: Vigani na gôndé me 13

Matthieu 11:28

Vigani na gôndé me, anye muetso nôgogini
na anye muetso nôditéôni. Me te môdundédine
wanyô.

Apocalypse 22:17

Gédidi SaNzambé na muéba ômabaôni, ahba-
mbéa mbe: Vigaka. Na ône oôkôni eenda mbe:
Vigaka. Na ône oôkô sôé avigéké, avinyua meba
meetsa monyo mangeetsô angô géenza.

Jean 7:37

Jésus amatema va mbene agéômbége. Muetso
amookô vameekédangô mbe: One oôkô sôé avigé
na gôndé me gôényua.

Esaie 55:1

Akasô vigani. Anye muetso nôôkô sôé, vigani—
maani meba. Buéyé n'ewe ôsaba na dode, viga.
Vigani. Sômbéni. Aakéni. Endé te nane. Vigani
sômbéni maduku na môyakô gébé na dode, gé-
vané ta na sôma.

Esaie 1:18

Nzambé angô mbe: Vigani tôvinigôana vavo.
Buéyé mbe ébévee éoo éndé na tsoo ga gé-
singô, éngaba na vee ga égudé. Buéyé mbe
ébévee éoo ébaké na gubétsetse, éngaba na vee
g'obôngé.

I Jean 3:10

Nôeni éne étubéda na vede mbe adua te ana aNzambé na adua te ana aYabédé, étubéda mbe ône aseenda éne ényôngéô Nzambé, na asanyôngéô môkedi, angô kaka muana aNzambé.

Romains 8:14, 15

Ane asinga Gédidi SaNzambé mbe gétôma ahngô, te ana aNzambé. Gédidi gémeetsô wa n'anyô na Nzambé gésatônikéda gôéba avéga atômu na gomo. Ivô Gédidige géne gétôbôta ana aNzambé. Gôndé we gô mbumu éEdi, Gédidi Sedi gétôwedéa gôémôneegeda mbe: Téta, Téta.

Philippiens 2:15

Vane nôngaba n'etsimama na nômagôgéani. Nôngamenyanganô mbe: ana aNzambé agébé n'oési, nôdigaa va gatsé oma abévani adiboe andé gô tsengene. Tanani ga minanga gô tsina évitsi.

II Corinthiens 6:17, 18

Te gamavovo Kumu Nzambé mbe: Anye oma-mi, nôtôgani, aaganani n'ahngô. Nômbiabanda ta na bandaga, mane maô meevindô. Na me nanganôwanyeda omami na gényônga. Me nangaba Tétanyô. N'anye dôta te anami amôgôô n'anami ageto. One avovoni te me, Kumu angudi yetso.

Proverbes 23:31, 32

Ombiabono maduku ta na bonogo meetêô gô gébungu. Enyepee éedi éndé gôévooto éwe. Omina mangô ti na môgangu, tambô mianga-gamie miedi mindé ga nyogo. Ekôdéô éamangô te gôégômbata ga mbige.

Galates 5:19 na 21

Esima éamôtéma amôma éenanô. Eangô te gésasô na matasa masagôsagô, n'ebéva, na égo-beda mbumba yegoni, na maganga, na adudanô anguene n'anguene, na masaganéda, na ngusu, na dipisa, na misoso, na pingô yéômbé ésaba na vitôô gô Mabégô MaNzambé, na ényima, n'edangi, n'onzôô éaa môyakô, na mabégô mamônongo ône. Me nanôevéda mônongo gamani me éno-beenda mbe: ane eenda mabégôme mane, ahsangadigaa g'ôkumu aNzambé.

Romains 13:13, 14

Tôdigékéni gô ésima ésapenganani, wa n'anyô asi gô gévede. Tônôtôgénéni gô évitsi na ésimee yedi éasagô, na éedangi, na éagésasô na éamasa-ganédana na éangusu. Bandôa gô matambé na gô môtsé tôatékéni monyo aKumu asô n'anyô Jésus Christ gatôaata maduani. Nômbiasingana na manyima mabévani mayôto yasô n'anyô gôédugéda mangô.

16 Okô ôsiba na Jésus gô môtéma, ôvômeyee, ôsaba na tsoongo

Marc 10:17-22

Vamaba Jésus aka gô kéaga gô nzéa, mômô-gôô amaviga pita na gôdné angô. Amasiba ma-bongome va mbene aJésus. Angô mbe: Ewe môékédi ôndé ti môékédi amôsôba aabéa me. Gôéba na monyo amôbô na môbô ?nangeenda nayee? Jésus amamônikéda mbe: Oteta me mbe: Môma amôsôba ?nayee? Gôsaba môma amô-sôba buétsé te Nzambé Amuene. Ewe ôsabômu mige miaNzambé mbe: ômbiayôa. Ombiakea te gésasô. Ombeesua. Ombiapatéa môma noo. Ombiabôméda akoo. Gobeda tétoo na yoo. Mô-môgôô nône amaabéa Jésus mbe: Môékédi, me bandôa g'ôanangé ami, nakenea mige miemi mietso. Jésus amamôbono na gényônga. Angô mbe: Gôndé éwe gôsanévi ébégo évo. Kiaka sômbédé éetso éndé n'ewe. Bonge dodeye ôke-kabanéa misuga. N'ewe ôngaba n'okiti g'ôba. Na vane, viga. Oka nzéepo n'ami. Vamookô mô-môgôô ôgie ône, gédimô sedi gémadita. Na ama-kea na mônyongo. Môtémedi ômeena panda gôébégô amabaka n'okiti edi ôvôni.

Proverbes 16:25

Nzéane ékea môma amenya mbe ényepa, tambô, ékôdéô éayangô te ôwa.

Nômbiabômédu anyene. Mabégô MaNzambé nôndé gôéôkô mangô te ôkôgô étévô ?nayee? Indakani mane mookô anye gô mangô.

— Jacques 1:22

Nômbiabômu. Menyani mbe abévie asangeengéa g'ôkumu aNzambé te anguaa. Asi mata-same meengéa gô gésasô na makusa te gô gésasô, na agobedi ambumba yegoni, n'akeyi agésasô, n'angô ayanza gésasô amôgô anguene n'anguene, ageto anguene n'anguene, n'eesui, n'asi ngusu, n'asi édangi, n'atokoni, n'asi môkôbé. Omee ane asangeengéa g'ôkumu aNzambé.

— I Corinthiens 6:9, 10

Nôkenea kabagaa môma anôbômédu na mavovia maô mabuembe. Te gô mônongo ôési ône ôngeenanô ôpisa aNzambé ôeeséda ane asamôgobedani.

— Ephésiens 5:6

Anami anéngé, nômbiasinga môma abômédu anye. One eenda mane meetsimama andéké amatsimamani. One agéyanzaka mabégô mabévani angô te môma aYabédé. Yabédé amapanga éenda mane mabévani v'ebandô. — I Jean 3:7, 8

Okô môma amenya mbe: Me nandé ti môma môvôni, tambô te môma abobo, abômédu te amuene.

— Galates 6:3

Romains 5:12

Ebéva éndé n'oma gê tsina, ébandôe te môma môvo, Adam. Na ébévee émakôva ôwa. Na ôwa ôtsôpa oma muetso gêébégô muetso eenda mabégô mabévani.

Jacques 1:15

Mônongovo gatsua môgeto atsua émé évunda, na abôta te muana, te mônongovo ga ényima ébévani éndé gê môtéma amôma. Eangô étsua ébéva na ébôta te mabé. Na ékôdéô éamabé te ôwa.

Romains 8:6

Mikebanganô miamane manyima ôto mikeda môma na g'ôwa. Ivô gékeneo samane manyôngéô Gédidi SaNzambé gétôétsa monyo na gétabé.

Ezéchiel 18:20

One eenda mabévani angawa. Muana asanga-tsundédu gê mane matétedi. Tétee dôta asanga-tsundédu gê mane mamuanedi. One amatsimanani atsundédu gê mane maamuene. One môbévani dôta atsundédu te gê mane maamuene.

Luc 15:32

Ivô deo noo tôtsôkékéni na tôaakéni môambôe gôvigi môdimine woo ône. Môdimine woo ône abaki mônongovo ga môma amawani na aniki gôéba na monyo. Amadimbanaka na atsutsugi.

Jean 11:43, 44

Vamamanangô évovo nane amaamugana mbe: Lazare, kusa gône. One amawani amakusa gô ngii. Makôdô medi na mogo medi mamadipô na mikanda. Osôe ômeebedu na môkandee ômakatôkô môtsée. Jésus amatôma omee mbe: Tsôbôani angô. Tsikani angô akea.

Apocalypse 1:18

Me te Kumu amonyo. Namawaaka, géé deo noo nandé na monyo ôsakôdéakani. Amen. Môsapie owa, na tsengene éowa ôndéké n'ami.

Jean 10:17, 18

Téta, ône aseendô gôényôngéô me te gôéétsa me monyoe wami gôéwa gômbe nangoomba édiia wene monyo. Gôsaba môma anôtôa me monyoe wami gôéyôu. Ivô naadeekeda memuene gôéwa. Nandé n'enyanga gôéadeekeda memuene gôéwa, nandé n'enyanga dôta éômba éba na monyo. Te éne ématômu me na Téta.

Luc 7:14, 15

Jésus amaweséa gôébanda gô gégaage gémbaka nzumbine. Atsuayie anZumbine amatema. Jésus amavovo mbe: Mônzambu, me nagôénda mbe: Timôga. Nzumbine émadigaa na émabandôa évovo.

Deutéronome 5:7-21

Nzambé angô mbe: Ombianeegeda sene sôma buétsé te me môtévo.

Ombiapaka mbumba yegoni. Ta na gégoni gévo sa éne éenanô éndé gô ngongo, na éne éenanô éndé gô tsina, na éne éenanô gô tsina ambéyi. Ombiasiba mabongo moo va mbene ayangô. Ombiayanzéa yangô.

Ombiateta sagôsagô ina aNzambé éoo Amôbô na Môbô, ône aneegeda éwe. Nzambé asangatsika éwe gésosedu gô éne évovi éwe inedi sagôsagô.

Tanganeda nyee édunda ôgobeda angô. Te éne ématômu éwe na Nzambé éoo Amôbô na Môbô. Angô mbe: Oyanza pitsi môtôba gôédu-géda éyanza éoo éetso, géé éne éatsambué te nyee édunda aNzambé éoo Amôbô na Môbô.

Gobeda tétoo na yoo, te éne ématômu éwe na Nzambé éoo Amôbô na Môbô.

Ombiayôa môma.

Ombieenda gésasô.

Ombieesua sanga sôma.

Ombiapatéa môma noo.

Ombianyima sôma samôma noo. Ta na môgayedi, ta n'ebedi, ta na tsaga éedi, na ayanzie edi amôgôô, n'ageto, ta n'ebodue yedi. Ta na sôma gévo samôma noo, ômbianyima sangô.

Proverbes 15:3

Miso maNzambé mabono étungue éetso. Eena abévie, na anyepie.

Luc 8:17

Metso masuéguni mangaba mamatsutsuuni. Na metso mav'esooe mangaba mav'ekanga na mamenyanganôni.

Psaume 139:8 na 12

Okô nabati na g'ôba, éwe Nzambé ôndé te wangô. Okô nasumi na gô tsengene ane amawani, n'ewe ôndé te wangô... Buéyé mbe évitsi ésoongôa ésomeda me va miso moo. Ewe ôena na pitsi na vede te ee mbe te ômanda. Gôndé éwe, évitsi n'omandee éetso éndé te mônongovo, te ômanda ôtévo.

Job 34:21, 22

Nzambé eena midigédimie mioma muetso. Miso medi mandéké gô matambéme mayeta môma na môma. Buéyé mbe évitsi, buéyé mbe ôwa, gôsaba gésoméô géngasomo môma môbévani.

Jérémie 23:24

Nzambé atôeevôa mbe: Gôndéké môma angasomo v'esooe ?me gémôene-a? Gôsaba. One ayuéséda éetso, na g'ôba na gô tsina ?kaka me Nzambé-a? Te me ône Amôbô na Môbô.

22 Gôndéké Tsôgôô éamôbô na môbô gôndé abévie

Ivô tsina n'oba éndé n'asô n'anyô deo noo, ékenéô n'ogi aNzambé ngu na ndéône éngayôé-du yangô na soto. Ekenéô ngu na gô nyaa amô-tsundu ôngabunzu oma abévani. — II Pierre 3:7

Ome abévani akea abono tsenge éowa. Angô n'asi tsengeye yetso disagobeda Nzambé.

— Psaume 9:18

Okô ôgogoe woo na ôkôdôe woo ôndé ga pagô gôégôkubéda gô mabégô mabévani, kitsa angô. Gunya angô gôdagôda n'ewe. Okô ôndé n'ogogo ôvo na ôkôdô ôvo, na monyo apie gô môtémo, ésadaga gôndé éwe. Okô ôndé na mogo moo mabaé, na makôdô moo mabaé, na ôkea na gô mungu asoto, te éne éôtéa édagani. Gône te gô sotoge géseemakani. — Matthieu 18:8

Me, Muana Amôma nangatôma anzi yami gôésevôa ane akubéda akaô gôéénda mane mabévani, na ane abévani muetso. Amôtôa ahngô va gatsé oma agobeda me. Ane abévani angasevôuni angagunyu na gô gétungu sasoto. Gône angadéa mienge na gô pievia yaô angagéa ngeko.

— Matthieu 13:41, 42

Asi géeyo gégeto angakedu na gô tsôgôô amôbô na môbô, géé asi géeyo gémôgôô angeengéa na gô monyo amôbô na môbô. — Matthieu 25:46

Hébreux 9:27

Emakitsô mbe: Môma na môma angawa te eta épo, na va mbene owa angatsundédu na Nzambé.

Actes 17:31

Endé te nane. Amamana ésevôa nyee ônga-tsundéda angô oma muetso na môtsundu agépenganédé. Tôngatsundédu na ône amasevôa Amuene gôéba môtsundédi. Ndémbone éamôtsundédine te éne émakunduu angô na Nzambé g'ôwa.

Romains 14:12

Vane, wa n'anyô muetso tônganigôa Nzambé mane masô n'anyôene.

II Corinthiens 5:10

Gô éné éyanza we tôdônga na yôtô yedi tôngatsundédu vatemala we va mbene aChrist. Tôngadiia môma na môma, éné éndé kuanakue n'edi buyé mbe mane mamisôba vo mane ma-bévani gamayanza wa n'anyô gô yôtô yedi.

II Pierre 2:9

Kumu asabômu éoboo omedi gô ékuanô. Kumu asabômu ékenea oma abévani ngu na gô nyaa amôtsundu.

24 Jésum Christ atôétsa mate medi ôbiia

Gékineo sAdam gô môtôma aNzambé gésaba ébégô évôni gandé ôbiia ômeetsa Nzambé ôndé-ké ébégô évôni. Na gô pie ayekani amawa gô ôési ômeenda mômane amapanga, Adam. Ivô gô ngudi yamômane amôbaé, Jésum Christ, aye-kani ameetsô na Nzambé ôbiia ôvôni gô ngeba yedi. Na ébégô éamôbaé éootéa éne éamapanga.

—Romains 5:15

Tôkumédéni Nzambé gô éne étôétsiô n'Edi géenza ésaba matangôéyô.

—II Corinthiens 9:15

Nzambé akina asi bôpee. Ivô angô eetsa mate medi gôndé ane ahndé na mavôma.

—I Pierre 5:5

Anye nôsabômu étondo na géenza gémeetsô wa n'anyô na Kumu Jésum Christ. Amabaka gé-
kiti. Amakoga môsuga te mbe wa n'anyô tôkoga ékiti.

— II Corinthiens 8:9

Ane amatômukuni amanigôa gékundugeo sa-Kumu Jésum na ôtômu ôvôni. Na Nzambé amee-tsa ahngô muetso mate mavôni.

—Actes 4:33

Tambô Nzambé asabono ényepa éamôma na mayanza medi, ivô Amuene asevôa gô ngeba ye-di ône anyôngéô Angô mbe amôena ngeba.

—Romains 9:16

Koani mitéma mianyô gôéba wene mônongo 25

Tambô koani mitéma mianyô. Gégôgani na gôndé Nzambé mbe anônôtôa mabégô manyô mabévani. Vane Amuene Kumu angavigéda ndéô éagétabé. — Actes 3:19, 20

Nzambé asabonodô ndéône émaaba môma g'ôdungé, angô gébeendu. Deo noo Nzambé abambéa oma muetso, asi tsengeye yetso mbe: Koani mitéma mianyô gôéba wene mônongo. — Actes 17:30

Ti me, nanôbeenda mbe: Kaka nane. Okô anye nôsikoa matasa manyô nongawa te mônongovo. — Luc 13:3

Anye asi mbumu alsrael ?nôwa gôndé? Tsikani gésimage sanyô seekékôa ndongi yaNzambé. Ebévee éanyô te gékékuéôge géne. Kogani, baani na mitéma miamanza na édidi éamanza éawene mônongo. — Ezéchiel 18:31

Ameekéda mbe: Koani mitéma mianyô mbe nongaba wene mônongo gôébégô ôtômu aNzambé ôweséyi na gôndé wa n'anyô gôétôoboo. — Matthieu 3:2

Nzambé asakina môma andé na môtéma ôditani na tsoyi. Tsôéne ényôngéô Nzambé mbe nômiôkô, te éne ékôva gékoge samôtéma gôédiia géobogeo saNzambé. Géé tsôéné éatsengene ékôva te ôwa. — II Corinthiens 7:10

26 Nzambé asingéa ébévee éamôma kokoo

Esaie 55:7

Nzambé anyôngéô mbe môma môbévani atsi-ké nzéane ékéa angô ébévani. Anyôngéô mbe môma asagô atsiké matasame medi maamuene môma. Anyôngéô mbe môma anikéa égéngôga na gôndéké One andé Môbô na Môbô angamôena ngeba. Buedi mbe aniké na gôndé Nzambé éasô n'anyô, ône asakôngéda mane mambeego mamamana ésingéô kokoo.

Actes 5:31

Nzambé amatômba angô na g'ôba na amamôdigéda va géeyo sedi gémôgôô. Ameetsa angô ényangee. Na ameenda angô mbe: Ewe te Moo-boyi ana alsrael mbe angakoa mitéma miaô gôésingéô kokoo gô mabégô maô mabévani.

Matthieu 6:14

Okô anye nôsingéyi akanyô kokoo gô mabégô mabévani meendangô anye. Tétanyô ône andé g'ôba anganôsingéa dôta kokoo.

Ezéchiél 18:21

Gôndé môma môbévani éndé te nane. Okô angô agéngôga na gôndé me Nzambé, na atsi-ké mane mabévani metso mamayanzangô, na akenea mitôma na migemie miami gôégobeda miangô, angaba na monyo. Okô eendi étsimamee ényôngéô me asangawa.

Pangani étasa gô mane mag'ôba, kaka mane matsengene. — Colossiens 3:2

Menya mbe Nzambé amatsutsuéda ngeba yedi gôéoboo oma muetso. Ngebaye yedi dine ditubéda we ganyôngéô Nzambé mbe tôviié ngima môdigédi asagô na tsôvé yetso yava tsina. Na ganyôngéô Angô mbe tôdigéeé na mavôma gô tsengene na ésima éamisôba ésapengana n'ene ényôngéô Amuene. — Tite 2:11, 12

Ovôani mitéma mianyô. Gôgédani miangô. Aaganani na mayanza manyô mabévani na gôdagôda n'ami Nzambé. Kabaga miso mami meena mangô. Nômbioomba éénda mangô. — Esaie 1:16

Nômbianyôngéô mane matsengene, na éne éndé wangô. One anyôngéô mane matsengene, asamenya ényôngéô Téta Nzambé. Eetso éatsengene na manyima mabévani mamôtéma na tsôvé yamane meenanôni na nyemo éôkiti atsengene. Metso mane masaviga gôndé Téta Nzambé maviga te gô tsengene. — I Jean 2:15, 16

Nômbiakanéga évamba n'ane eenda ésima ésaba na tsoongo va mbene aNzambé. Tsigéda ésima éaô éévitsi na gô gévede mbe éenanô. — Ephésiens 5:11

Ezéchiél 36:26

Me Nzambé, nangagôétsa môtéma amanza. Nangakuya gôndé éwe sene gédidi samanza sawene mônongo. Nanganôtôa gô ôtôe woo môtémee woo ambeego ôndé g'etaé. Nangaviaganéda wene môtéma ôôkôni.

Jean 3:3

Jésus amasiia n'edi mbe: Nagôbeenda na gôpie mbe: Okô môma asibôtu ôbôtu amôbaé, ône aGédidi SaNzambé, asangamenya ôtômu aNzambé na mate meenyangedi.

II Corinthiens 5:17

Okô môma aka monyovo na Christ akou pepe, aka wene mônongo amôma. Metso mane mamabaka n'edi mambeego mamadimbana. Na mane mandéké n'edi te mamanza mamisôba.

I Jean 2:29

Nôsabômu mbe Christ te Kumu éetsimama, na vane nôsabômu dôta mbe ône eenda étsimama andé amabôtu na Nzambé.

I Jean 5:18

Wa n'anyô tôsabômu mbe môma amabôtu na Nzambé asangoongôa éombeenda mabégô mabévani n'osôbedi. Gôébégô Muana ANzambé ake-ne angô, na amuene môbévine asangoongôa étsôpa angô.

Gô mane mabévani tondé ga nzumbi. 29
Gô mane maChrist tondé tômakundugani

Ephésiens 2:1 na 6

Va mbeego édidi éanyô érabaka gô évitsi ti ee mbe érabawa gôébégô adiési yanyô na ébévee éanyô... Gô évambee éndé n'asô na Jésus Christ, Nzambé amatôkundua g'ôwa gômbe tondé ôtômu ôvô na Christ na tondé digaa n'Edi gô ényanga éag'ôba.

I Pierre 2:24

Angô amatsua mabégô masô n'anyô mabévani g'ôtô edi va gésumu sowa. Gômbe tôngagongo ga nzumbi géyanzédo mabévani. Ivô tôngaba na monyo gôéyanza étsimama. Gô ngudi yapôta yedi anye nômadôngédu.

Galates 5:24

Ane andé gôndé Jésus Christ ahmeeséda anguene gôésôséda mitéma miaô na tsôvéye yetso dibévani na manyima metso mabévani.

Romains 6:2 na 11

?Tôomba te édigaa gô mabégô mabévani gôébuta éyekéda ngeba yaNzambé-a? Géndégégé! Tômani éwa gô mane mabévani. ?Tôngoomba éyanza gô mangô nayee?... Tôndéké ga nzumbi ésatômuku na mabégô mabévani. Ivô tondé misiki na monyo gôédigaa gôndé Nzambé na monyovo na Jésus Christ.

Gamatômba Moise gégoni sanyogo éakunga
gô péndé gô tsenge émagasani, te ôtômu mbe
me Muana Amôma nangatômbu te mônongovo.
Gômbe ône eetsa môtémedi wetso na gôndé me
angaba na monyo amôbô na môbô.

—Jean 3:14, 15

Môvano ôétsa ébévee gôndé môma, te ôwa.
Ivô ôbiia ôétsa Nzambé géenza gôndé môma te
monyo ôsakôdéakani gôédigaa évambevo na Ku-
mu asô n'anyô Jésus Christ. —Romains 6:23

Monyo amôbô na môbô ôsakôdéani ôkegea
mbe, omee ane angavamba n'ewe, Nzambé épo
éapie ôsaba na gégoni. Ekegea dôta mbe anga-
vamba na Jésus Christ, ône amatôma éwe.

—Jean 17:3

One eetsa môtémedi wetso na gôndé Jésus,
Muana ANzambé, andé na monyo ôsakôdéakani.
One aseetsa môtémedi wetso na gôndé Jésus
gôémôgobeda, asangadiia monyoe ône ta na
pesu. Na Nzambé angeena angô te ôpisa.

—Jean 3:36

Okô môma angaaba mane mabévani manyima
môtémee, angô akandéda te ôwa. Na môma agaa-
ba mane manyôngéô Gédidi SaNzambé, Sangô
gékandéda angô monyo amôbô na môbô.

—Galates 6:8

Nzambé amakudéga na gô mitéma miasô n'anyô Gédidi SaMuanedi Jésus, gôébangôéda wa n'anyôene mbe na gô pie tondéké anedi. Gédidige géne te sangô géamugana mbe: Ah Téta.

—Galates 4:6

Okô môma atanganéda mane mamatôma me, Jésus, na amagobeda, vane namenya mbe môma nône anyôngéô évamba n'ami. Vanyôngéô angô me, anganyônganéô dôta na Téta. Na me nangamônyôngéô te mônongovo. Na nangatsu-tsuga te gôndé angô.

—Jean 14:21

Gôeenanô éwe na Nzambé ti ee mbe ôsaba n'oési, môtémeé woo ôngaba ômayôa na gétabé. Gôeenanô éwe na Nzambé ti ee mbe ôsaba n'oési éwe ôsangaba na mikebanganô n'ewe ôsangatsumadô géobogeoge soo paga.

—Esaie 32:17

Na Gédidige Sedi géwanyéda moonga na géne sasô n'anyô oma, mbe na gô pie tondé ana amabôtu gô mbumu aNzambé.

—Romains 8:16

Ene étubéda mbe tondé môvo na Nzambé na angô te môvo n'asô n'anyô ?yéndé? Te Gédidi Sedi gémeetsangô wa n'anyô.

—I Jean 4:13

N'atsatsee naviga na vandé éwe. Navovo n'ewe mabégô mema, nagébaka gô tsenge nédué. Nanyôngéô mbe mitéma miaô miyôé na gényônga sami gésaba n'okana. — Jean 17:13

Okumu aNzambé ôsagono na môyakô na meba. Oôtéa mane. Mabégô mokumu aNzambé te metsimama, na magétabé, na magényônga meetsa Gédidi SaNzambé. — Romains 14:17

Nabéyee na monyo, monyo ône ôsaba wami te aChrist. Deo noo nandé na monyo otô ami, te gôétsa me Jésus môtémani wetso. Angô Mua-na ANzambé amanyôngéô me na amadeekeda amuene amawa gô ébégô éami. —Galates 2:20

Anye nôbuéta meba gô gétôka sagéobogeo. Buétani n'ekasôga. — Esaie 12:3

Me nanôbeendi mabégô mema gômbe môgangué wami ôngaba gôndé anye na gényônga sanyô gêngaba gémadugani. —Jean 15:11

Ewe Nzambé ôndé gôétévêda me nzéane éamonyo. Va mbene éoo gôndéké gényônga gésaba n'ebando n'ekodeo. Gô géeyo soo gémôgoo gôndéké môbô na môbô te mabégô mamôgangu. —Psaume 16:11

?Tambô anye nôsamenya mbe nôndé na ngu-di yesevôa kumune ényôngéô anye, ône anga-yanzéa anye-a? Okô nôsevôa mabégô mabévani gôégobeda mangô, manganôétsa ôwa. Okô nôsevôa ôgi aNzambé gôégobeda angô, ônganô-tsimaméda gôéba gébé n'oési va mbene éEdi. Nôngaba avéga akumune éngagobedanye.

—Romains 6:16

Na angeetsa gévôgimeo gôndé anye nôndé gô maguga. Na gôndé we te mônongovo. Tônga-ba na gévôgimeo te vangaviga Kumu Jésus g'ô-ba n'anzi yedi yangudi. Anziye dingatsiga na so-to géyôani gôésiséda ane asineegede Nzambé n'ane asigobede Tsangô Eamôsôba éaKumu asô n'anyô Jésus Christ. Gésisédeoge géngéetsô ahngô te gébunganeo gésakôdéakani gôdagôda na Kumu. Asangavamba na ngudi yedi. Asangeena ôbébayi ôtubéda ôndomba aNzambé.

—II Thessaloniens 1:7-9

Bonokoni gatévéda me anye deo noo nzéa di-baé. Eé nzéa éamate mami. Eé nzéa dôta éamô-kokou ami. Okô nôgobedi mitômamie miami, Nzambé éanyô Amôbô na Môbô, minôtôma me deo noo, nôngadiia mate. Okô nôsigobeda miangô nôngadiia te môkokou. —Deutéronome 11:26-28

**34 Eootéani te gôégobeda mbe: Christ
te Kumu ami**

Na yôgi yamongome metso manganeegeda Nzambé nyaa ôngavovo yangô mbe: Jésus te kumu apie. — Philippiens 2:11

Jésus angô mbe: Muetso ane amema va mbene oma mbe: Me te môma aJésus, me dôta nangamômema va mbene aTéta mbe: Odôô te wami. Ivô ône atôna me va mbene oma, me dôta nangamôtôna va mbene aTéta. —Matthieu 10:32, 33

Okô éwe ônigôa akoo na mônnyee woo mbe: Jésus te Kumu ami, na ôsatsuma ngudi yaNzambé paga mbe amakundua Jésus g'ôwa, éwe ôngoo-bou. Gôébégô môma eetsa Nzambé môtémedi gé-tsumé Angô paga, na Nzambé eena angô ti ee mbe asaba n'ôési. Môma amema na mônnyee wedi amuene, na Nzambé ayuua angô gô môtsundu. —Romains 10:9, 10

Ekegea te nane. One akina Muana ANzambé akina dôta na Téta Nzambé. One asinga Muana asinga na Téta. —I Jean 2:23

Okô môma eena tsoyi gôndé me na Mabégô mami va miso moma, menyani mbe me, Muana Amôma nangeena tsoyi gôndé angô vangaviga me g'ôkumakami na g'ôndomba aTéta n'anzi yedi. —Luc 9:26

Matthieu 4:1, na 10, 11

Gédidi SaNzambé gématôma Jésus gôékea na gô tsenge émagasani mbe akekanégu na Yabédé. Vane Jésus amamônikéda mbe: Satan, nôtôga vane. Matendeo MaNzambé matôbeenda mbe: Neege da Kumu Nzambé éoo na ôyanzéa te angô môtévo. Vane Yabédé amatsika Jésus. Anzi dimaviga na va kôbangô aJésus gôémôwedéa.

Actes 26:18

Nakudéga éwe na gôndé ahngô te mbe ôpoeda ahngô misome. Na mbe ôngakuséda angô gô évi-tsi éndéké ahngô, gôéengeda ahngô na gô gévede sami. Na mbe ôngayuua ahngô g'ôtômu aYabédé ôdigaahngô, gôédeekeda ahngô na gôndé Nzambé. Vane vangeetsahngô me mitémamie gébé na paga, angasingéô kokoo gô mabégô maô mabévani. Angeetsô gétungu saô va gatsé oma aNzambé.

I Pierre 5:8

Bakani misiki. Wemani. Môdudéô anyô, Yabédé abégôa ga gémbungu gégunga gôébuta éngmbunguméa ône anyôngéô angô éaa.

Ephésiens 6:11

Nzambé anôétisa ékeeyie éEdi gôégenya. Tambô tsuani na aatani éangô gôéba na ngudi yekumba Yabédé n'eodoe éndé n'edi gôégenya.

36 Gô ébadie égenya we na Satan, we tôédiia

Jacques 4:7, 8

Sugédani anyene va mbene aNzambé. Kékôani mane maYabédé na angakôndangana na gôda-gôda n'anye. Weséakani na gôndé Nzambé na angô angaweséa na gôndé anye.

Hébreux 2:14

Ane atetu n'Edi mbe: anami, te oma ava tsina ahndé na yôtôye na nzina. T'ebandô Amuene Jésus amakoga gôéba na ôtô amôma gandé oma muetso. Jésus ameenda nane gômbe angawa na ôtô edi amôma gôébunza Yabédé ône andé na ngudi yowa.

I Jean 3:8

One agéyanzaka mabégô mabévani angô te môma aYabédé. Yabédé amapanga éénda mane mabévani v'ebandô. Muana ANzambé, Jésus asivigé gô yene ébégo. Amaviga gôébunzéda mayanza maYabédé.

Romains 8:35 na 37

Ene éngaaganédana wa n'anyô n'etondo na ngeba yaChrist ?éndé? ?Te maguga-a? ?Te mindôngamie-a? ?Vo gékuanôge-a? ?Vo nzaa-a? ?Vo ôsuga-a? ?Vo mabégô madagani-a? ?Vo ôwa-a? Mabégô mema masangoongôa étôaaganédana n'etondo éaChrist... Ivô gô mabégôme mane metso tôdiia te diiaga gô ngudi yone atônyôngéoni.

**Etondo te môdodo ôpisa wa n'anyô
aneengi aJésus**

37

I Jean 4:20

Okô môma avovo mbe: Me nanyôngéô Nzambé na angô adudu môkedi, angô te môpati. Bononi ?nayee angô anganyôngéô Nzambé aseenanôni, gényôngéô môkedi eena angô na miso?

Galates 5:22, 23

Gabôta géétété samôsôba gébôta miônda miédi miamisôba, mônongovo gaGédidi SaNzambé gékuséda gô môtéma amôma ésima éedi éami-sôba. Gékuséda t'etondo, na gényônga, na gétabé, na ôbibô, na tsôvé oma, na ngeba, na mavôma, na gôéba gébé na nyemo, na gôéodéda môtéma gôékina manyima mabévani.

Jean 21:16

Vane Jésus amamôeevôa éne éamôbaé mbe: Simon, muana aJean ?ônyôngéô me ti na gô pie? Simon amaabéa angô mbe: Ii, Kumu. Osabômu mbe me nagônyôngéô. Jésus amavovo n'edi mbe: Kenea mandombo mami.

I Jean 3:14

Gôndé wa n'anyô tômanôtôga g'ôwa gôéengéa gô monyo. Tônyôngéô ana aTéta agô mbumu aNzambé. Géne te gémbégéa samonyoe ôndéké n'asô n'anyô. One asanyôngéô muana aTéta n'edi agébaka g'ôwa.

We avo tondé émoni éametso mamayanza Jésus gô tsenge édigaa Ajuif na gô Jérusalem. Amamôbôkêda va gésumu sowa gôémôyôa. Ivô pitsine éamôtatô, Nzambé amamôkundua g'ôwa. Nzambé asimôsingée atsutsuga gôndé oma muesto. T'ebandô Jésus amatsutsuga gôndé we tô-masevôu na Nzambé na mbeego, gôéba émoni éedi. We avo tômanyua tabudé épo n'edi vama-mana Nzambé émôkundua g'ôwa.

— Actes 10:39-41

Nzambé ameetsa Jésus gôéwa gô mabégô masô n'anyô mabévani. Amamôkundua gôétôtsimaméda va mbene aNzambé ti ee mbe tôsaba n'oési.

— Romains 4:25

Pitsi môtôba dimoota, aneengie aJésus amoomba éduga vavo gô eba. Ahngô na Thomas muesto. Ebee ômabaka ômabandéku na môsapi. Ivô tsina na tsina Jésus amatsiga amatema va gatsé aô na amavovo mbe: Gétabé gébaké gôndé anye. Vane Jésus amavovo na Thomas mbe: Weséda môsavie woo n'eva. Bonoko magandakame mami. Weséda ôgogoe woo. Bandaka tsungune yami. Tsika pagaye yoo. Itsa me môtémee woo. Thomas amamôneegeda mbe: Ewe Kumu ami. Ewe te Nzambé ami.

— Jean 20:26-28

Tsoongone éasô n'anyô, te gékundugéô 39 sane amawani

Jean 5:25 na 28, 29

Me nanôbeenda na gô pie mbe: Gô ndéô évi-gani, na émani ébuéa, ane amawani angookô ôgie aMuana ANzambé. Ane angookôni, angaba na monyo... Nômbiatsapéô gô ndéô étôweséa-ni. Te ndéô éngookô muetso ane amawani an-dé gô ngii angookô ôgie aMuana ANzambé. Na angatimôga gôékusa gô ngii. Ane amayanza gô monyoe waô mane manyôngéô Nzambé angaku-nduga gôédiia wene monyo. Ane amayanza gô mo-nyoe waô mane masanyôngéô Nzambé angaku-nduga gôésisédu.

Matthieu 16:21

Bandôa nyoone Jésus amapandôéda aneengi edi na vede mbe: Engaba mbe me nangakea na gô Jérusalem gôngeena me maguga mamooté-ani. Peeye na tsesu yadeekedi adigondoku, n'ani-gôi amige miaNzambé angatseda me. Nangayôu. Gô mbene apitsi dibaé, éne éamôtatô nangaku-nduga.

Marc 16:9

Vamakunduga Jésus g'ôwa nyaa tsono n'on-gôngôe wetso, amapanga étsutsuga vandé Ma-rie môsi Magdala. Marieme mane te ône ama-kuséda Jésus édidi tsambué ébévani.

40 Tôbaké gébé n'oesi va mbene aNzambé

Luc 1:74, 75

Mabégôme te mbe: Tôngakusédu gô tsina a-ngudi yavingi asô n'anyô. Te mbe tôngayanzéa Nzambé gébé na gomo amôma. Ameenda nane gômbe tôngaba oma aNzambé na gébé n'oesi va mbene edi, pitsi yasô yetso yava tsina.

II Corinthiens 7:1

Wee yami, ôvangee ône ômavanga Nzambé mbeego ôndé na ngudi gôndé wa n'anyô deo noo. Tambô tôbaké n'ekena gôébusuga mane mee-vindô kabaga tômagônga gôébévêda ôtô na gé-didi gagônga môma mbéka éambii. Tôadeeke-déni wa n'anyôene na gondé Nzambé gôédigaa monyovo n'edi na gomo gôémôgobeda.

II Timothée 2:21

Okô môma agôgêda môtémedi gôéaagana na mabégô mabévani metso magôbeendi me, angasevôu gasevôu gépedee sokumaka gôéyanza mane mavôni masoongôa muetso éyanza. Môma nône gandé angô môtémedi wetso gôndé kooko edi, eenanô n'edi mbe: andé na tsoongo. Angamôyanzéa ésaôe éetso éamisôba éngatômu angô.

I Pierre 1:15

Mônongovo gandé amuene Nzambé amabambéa anye andéké amatsimamani, anye dôta bakani amatsimamani gô midigédi mianyô.

Wangô gôngaba nzéa, te ômbambee ôngatetu mbe: Nzéa ékea ane asaba n'oesi. Gôndé ane asigôgéduni asangoota wangô. Gôndé ane asaba n'eodo andé n'odungé, ôkô amani étsiga gôéaanda nzéane, asangadôbômu. — Esaie 35:8

T'ebandô Amuene Jésus amawa gô kôbangô amôsenge. Te gôégôgêda oma gô ngudi yanzi-na yedi. — Hébreux 13:12

Okô tâtuba va mbene aNzambé mbe: Me te môma môbévani na tôétséni Angô mitémamie gôébégô tôsabômu mbe Nzambé te Kumu amavôma na gondé wa n'anyô asapata. Atôsingéa kokoo gô mabégô masô n'anyô mabévani na atôgôgêda mangô. — I Jean 1:9

Me nanôbatésa na meba gôétubêda mbe ane ye nôkoi mitéma mianyô. Ivô gô ngimami gôviga muene anganôbatésa na Gédidi SaNzambé, na soto. Ngudi yedi diôtéa dine yami. Me te gé-tôkôtôkô. Angô te môtsé. Ivô tsaba pengô gétôkôtôkô. Nandé ti gô tsina agétôkôtôkô.

— Matthieu 3:11

Menyani mbe Nzambé, madeo asikana tsina n'oba amapanga ésevôa wa n'anyô gôégésangana n'Edi gô ngudi yaChrist, gômbe tôngaba n'etsimama na gébé n'oesi va mbene Edi.

— Ephésiens 1:4

42 Nzambé anyôngéô mbe mitéma mibaké mimayôa na Gédidi Sedi

Aneengie aJésus amabaka mitéma miaô mimayôa na Gédidi SaNzambé na ahmatsôkéa na gényônga gévôni. — Actes 13:52

Ivô anye, nôsadigaa gô ngudi yaanyene na gô manyima mayôtô yanyô. Gédidi SaNzambé géndéké gô mitéma mianyô. N'anye nôdigaa ganyôngéô Sangô. One asaba na Gédidi SaChrist gô môtémedi, angô asamenyanganô na Nzambé.

—Romains 8:9

Buéyé gandé anye abévi nôsabômu eetsa anee wanyô éômee éamisôba. Tambô na tétanyô, ône andé g'ôba ?asanganôétsa Gédidi Sedi-a? Angeetsa Sangô te gôndé ane amôdukani. — Luc 11:13

Me Nzambé nangeetsa anye Gédidi Sami. Nanganôwedéa mbe nôénda mitôma miami, na mbe nôkenea mige miami gôégobeda miangô.

—Ezéchiel 36:27

Menyani mbe anye nôngadiia ngudi vanga-viga Gédidi SaNzambé na gôndé anye. Anye nongaba atsuayi atsangô éami . . . — Actes 1:8

Vamamanahngô évovo na Nzambé, tungune érabakahngô ématatéa. Gédidi SaNzambé gémeengéa gôéyuéséda mitéma miaô mietso. Ahmeekédaka na bôkédé na gébé na paga mane mamavovo Nzambé. — Actes 4:31

Nzambé gôndé asi mbumu edi

Nzambé angakôbôa ahngô keba yetso yagô miso maô. Owa ôsangabadô. Na mienge misa-ngabadô. Na mindônga na piévia édimbani te yetso. Mane mambeego metso mamadimbana.

—Apocalypse 21:4

Wee yami yetondo, nônatsapêô gôébégô panda dibuéa na gôndé anye gôénôkanéga mônongo ga soto gékoa madi. Tsôkéakani g'ôkabô ômadiia anye gô maguga mameena Christ. Mô-nongovo gangatsôkéanye na gényônga gémootéani vangatsutsuga ôndômba aJésus.

—I Pierre 4:12, 13

Kumu Nzambé asaagana n'ane andé na mitéma miditani gô maguga mapanda yaô. Nzambé ooboo ane andé na mitéma mieséda anguene gô éne ééndi angô.

—Psaume 34:19

Nzambé amavovo mbe: Eômee édué éetso émayanzô n'ogogoe wami. Eetso édôngédu te na me. Ookôni éne ébono me na miso mami. Nabono te ône andé gô panda na andé na môtéma ôeséda amuene gô éne ééndi angô. Nabono te ône atatéa ôgie wami.

—Esaie 66:2

Ombiatsuma Nzambé paga. Indaka mane manyôngéô angô. Osangabuta gétungu gôédigaa. Osangabuta ta na môyakô gôéaa. —Psaume 37:3

44 Ngudi yaNzambé dimavangô gôndé ane akanéguni

N'atsatsee Jésus andé na ngudi gôétôwedéa vakanégu wa n'anyô gô mane mabévani, gôébé-gô Amuene amakanégu te nane, na ameena panda te nane. —Hébreux 2:18

Maguga matsôpa kuka yetso ône amatsimamani. Amuene Kumu Nzambé ooboo angô kuka yetso. —Psaume 34:20

Okô éwe ôabôgi mbéyi, memuene Nzambé nandé n'ewe. Mebame masangapikaméa éwe. Okô éwe ônanga gô soto, ôsangayôu. Na ôtôe woo ôsangadeka. —Esaie 43:2

Menyani mbe Nzambé ayanza gôétônyepeda gô mabégô metso mabuéa gôndé wa n'anyô. Endé te nane gôndé wa n'anyô tôndé tômabambéô na Nzambé gamavanga Amuene. —Romains 8:28

Gôsaba ta n'ebégô évo éne ékanégu anye mbe akanyô ahsakanégu gô éangô. Nzambé asapa-téda gô éne émavanga angô mbe: atôkenea gô éne ékanégu wa n'anyô. Nzambé asasinga mbe éne ékanégu wa n'anyô éôtéa ngudiye dindé na wa n'anyô mbe tókékôa éangô. Gô ndéône éngatsiga éne éganôkanégani, Nzambé anganôétsa ngudi gôésipa na gôékékôa gômbe nôsangakuéa. —I Corinthiens 10:13

Divangaye yaNzambé dindé gôndé ane 45
adiia gô ébadie

Apocalypse 3:5

Te anye nômadiia gô ébadi égenyuni nôngaa-tédu mikanda miavembo. Mina manyô masangabusuu gô môganda amonyo. Me nanganigôa na gényônga va mbene atéta Nzambé n'anziye yedi yetso mbe: Adua te omami.

Apocalypse 3:12

Gôndé ône adiiiani gô ébadi angaba éengo ésipa eba wetso aNzambé éami. N'angô asangakusa wangô. Nangatenda g'ôtô edi ina éaNzambé éasô n'edi na ina amôsenge aNzambé. Môsenge ône te nyene Jérusalem atsatsee ôngasuma g'ôba va kôbangô aAmuene Nzambé. Nangatenda g'ôtô edi inami éatsatsee éndé n'ami.

Apocalypse 21:7

One amadiiani gô ébadi émagenyuni angadiia gôndé me ébégo édué. Me te Nzambé éedi, angô dôta te muanami etondo.

Apocalypse 2:7

Okô anye nôndé na matô, oôkôni môma na môma mane mavovo Gédidi SaNzambé n'anye asi mbumu aNzambé. Angô mbe: Gôndé ane adiiiani gô ébadi égenyukuni me nangeetsa angô ôtômu gôéaa miônda miagéétété géétsa monyo géndéké gô gatsé atsaga aNzambé.

46 Ndongi yaNzambé gôndé ane ayôa yômba

Ivô me nanôbeenda mbe: One akina môgayedi bobo, angô gééndé gésasô, angô te môma atubédi môgayedi gôékea gésasô. Na dôta ône abaa môgeto amakinôni eenda te gésasô.

— Matthieu 5:32

One akina môgayedi na abaa muene, akea te gésasô. One abaa môgeto amakinôni akea te gésasô.

— Luc 16:18

Môgeto amabaaôni andé gô tsina otômu amômiedi gô yômbaye dimaba ahngô ngu na vanga-wa mômiedi. Okô mômiedi awéyi, môgetone asabadô g'ôtômue ayômba, andé amatsikôni. Okô môgetone akea akebaaô na muene mômôgôô, mômiedi agédôngaka, angeendô mbe: môkeyi agésasô. Ivô ôkô mômiedi awéyi asabadô gô yômba na mômiedi. Na vane buéyé mbe abaaôkô na muene mômôgôô asangeendô mbe môkeyi agésasô.

— Romans 7:2, 3

Gôndé anye nômbaani na nômbaaôni ôôkôni môtômee ôdôô. Kaka me nanôtôma angô ivô te Amuene Kumu. Môtômee te mbe: Môgeto amabaaôni asanôtôga gôndé mômiedi. Na mômôgôône dôta asapatsa môgayedi. Okô môgetone anôtôgi gôndé mômiedi asoombadô ébaaô na muene, buedi mbe aniké na gôndé mômiedi.

— I Corinthiens 7:10, 11

Nôsabômu gakadima mikadikadi gésa na gésa bandôa gôviga kômbene na gôpenda kômbéne. Menyani mbe génikéô sami, Muana Amôma na gô tsina géngaba te nane. — Matthieu 24:27

Me nama viga. Simbédakani vi pesuvie vangudi vindé n'anyô, kabaga nôwatô n'oma môsendee wanyô ôngadiianye gô ébadi égenyuni. — Apocalypse 3:11

Okô môma eena tsoyi gôndé me na Mabégô mami va mbene oma andé n'edi ane asagobeda Nzambé na eenda mabévani, menyani mbe me, Muana Amôma, nangeena tsoyi gôndé angô vangaviga me g'ôkumaka aTéta Nzambé n'anzi yedi. — Marc 8:38

Bakani na mitéma mimasumani na mimoodoni. Génikéô saKumu géka gôpégôpé. — Jacques 5:8

Vane gémbégéa samemuene, Muana Amôma géngatsutsuga g'ôba. Asi mongo metso mava tsina angadéa na mindônga. Ahngeena me, Muana Amôma natsutsuga va gatsé adibôngé yag'ôba, n'enyangee éetso na ôkumaka ondômbami. — Matthieu 24:30

Vangakea me na vangakônzéa me anye tungu, nanganika. Nanganôbongo gômbe gôngaba me, n'anye dôta nôngaba wangô. — Jean 14:3

Luc 21:27

Vane nongeena me, Muana Amôma natsut-suga va gatsé adibôngé yag'ôba. Nangaviga n'enyangee yetso n'okumaka ondômbami.

Luc 12:40

Bakani nômakoamani kuanakue gôévengéa me, gôébégô me Muana Amôma nangaviga gô ndéône ésangatasanye.

I Jean 3:2

Wee yami, deo noo tondé ti ana aNzambé na mônongo ôngaba n'asô n'anyô gô mbene madeo tôsitubédu angô. Ivô menyani mbe vangaviga Christ mônongo ôndé n'edi tôngagono n'ango. Gôébégô tôngamôena mônongoe ôndéké angô.

Actes 1:11

Angô abae amavovo n'aneengie mbe: Anye asi Galilée ?nôtema gôégébaméa g'ôba gôndé? Jésus ôdôô, atômbiô va gatsé anyô gôékea na g'ôba, anganika mônongovo geenî anye angô abata.

Matthieu 16:27

Endé te nane. Me Muana Amôma nangaviga g'ôkumaka wetso aTéta n'anzi yedi. Nangeetsa môma na môma ngu na éne émeenda angô gô monyoe wedi.

Gésangô gegé gétetu mbe:

Ene Étôdôngédani Éviga G'ôba

Mabégôme mamasevôu gô Matendéo MaNzambé. Masanigôa me. Ivô manigôa te anguene Matendeome maNzambé.

Ogi ANzambé ôviga g'ôba. Ondéké môyakô apie na meba mapie gô mitémamie miane ookô nzaa na sôé. Okô môma eeséda môtémedi amuene na atsika mane mabévani mamayanzangô, na eetsa Kumu Jésus Christ môtémedi wetso gétsumé Mooboyi edi paga, Amuene Kumu angatsutsuga na vandé môma nône. Angeetsa gényônga na gétabé sedi gô môtéma amôma nône. Memuene namabandôa évamba na Kumu Jésus Christ gô 1937. Evambee éasô n'edi êkôndamaka te kôndama, na ésapanzégaka. Gôndé éwe ôtanga gésangô gegé, ôkô mbe madeo ôsideekeda Jésus Christ monyoe woo wetso, tambô ndéône yoo ébuéyi.

— O te me, Watson Goodman (1920-2002)

Published in numerous languages by World Missionary Press, Inc., as God supplies funds in answer to prayer. **For questions or more information by country, visit: www.wmp-contacts.org**

**Gésangô gegé gémakônza
Watson Goodman**

Géetsô ôbiia — gésasômbédu



World Missionary Press
PO Box 120
New Paris, IN 46553-0120 USA
www.wmpress.org

4-25

Read booklets online or by App
www.wmp-readonline.org

144/2 Gétsogo HFA